

# Talofa e i nai fānau, a nei ta iai le ēfu o le fau: 'Oto'otoga o le Tala fa'asolopito o Sāmusu i Āleipata

*Matavai Tautunu, lunvesite Aoao o Samoa*

## 'Oto'otoga

O le tāofisā o tagata Sāmoa e fa'asoa lo lātou iloa i le aganu'u ma agaifanua, aemaise i le saofa'iga a matai, ua avea nei o se fa'afitāuli i fanau ā'oga. A o atu fanau e fa'atino a lātou su'esu'ega i o lātou Fa'asinomaga ae tāofiofi mamau ma mumusu ni isi matai e fa'asoa lo lātou silafia i fanau ā'oga. O le manatu o le tusitala, afai ae tāofiofi pea le mau, talofa e i nai fanau, a nei ta iai le ēfu o le fau. O lenei tūsiga o le taumafaiga a le tusitala e fa'amatala se vāega o le talafa'asolopito o lona nu'u o Sāmusu, o se tasi o tafa o lona fa'asinomaga. O le sao lea o le tusitala i alo ma fanau e le gata o lona nu'u, itūmālō ae fa'apea ma i lātou o lo'o ao'oga i le Lunivesitē aoao o Sāmoa ma atunu'u i fafo. O se vāega o lana su'esu'ega mo lona fa'ailoga o le Fōma'i o le Tōfāmanino (PhD) i aganu'u a Sāmoa i le Lunivesitē Aoao o Sāmoa.

## Fa'atomuaga

Ina ua fa'atūina le Lunivesitē Aoao o Sāmoa i le tausaga e 1984 na tu'uina iai le matāfaioi, o le aoao mai, su'esu'e ma sa'ili'ili, fa'aolaola, iloilo, puipui malu ma fa'alauiloa le agagana, aganu'u ma agaifanua, ma le talafa'asolopito a Sāmoa (Grooves 2019: 24-30). O lea manulauti ua tu'uina atu nei i le Laumua o Su'esu'ega o Matā'upu Tau Sāmoa ma le naunautaiga ia avea o se Laumua Silisili i Fuafuaga 'Autasi a le Lunivesitē Aoao o Sāmoa mo le isi fa tausaga o i luma (NUS Coporate Plan 2021-24). O le ala lea o le fa'aauauina pea o su'esu'ega a tagata i le fa'a-Sāmoa e le gata o Sāmoa nei ae fa'apea ma atunu'u i fafo. Ua aliali mai o se fa'afitāuli le tāofisā ma le tāofiofi mamau o ni isi o le atunu'u e fa'asoa lo lātou tomai ma le iloa i matā'upu tau gagana, aganu'u ma agaifanua, talafa'asolopito o Sāmoa ma isi, pe afai e o atu fanau e fa'atino a lātou su'esu'ega mo le potosalalau.

Afai e fa'aauauina pea ona tāofisā le atunu'u, e fa'asolo ina maliliu i lātou o lo'o iai le tomai ma le agava'a i matā'upu tau Sāmoa, a o ai o le a fa'aauauina lenei iloa ma le mālamalama i tala o Sāmoa. O le ala lea e tāua ai le su'esu'e ma fa'amaumau tala o le atunu'u mo le silafia lautele.

O lenei tūsiga o le a fa'amatalaina ai se vāega o le su'esu'ega a le tusitala i lona nu'u o Sāmusu i Āleipata. E le gata mo le silafia e alo ma fanau o Sāmusu ae fa'apea ma le iloa e le fanau 'āoga o lo'o ao'oga i le Lunivesitē Aoao o Sāmoa ma atunu'u i fafo.

O le aotelega lava o manatu o le tusitala i lenei tūsiga, afai ae tūmau pea ona tāofiofi tala o le atunu'u e au ina tafea le mālamalama o fānau i o lātou fa'asinomaga, ona moni ai lea o le mau; Talofa e i nai fānau, a nei ta iai le ēfu o le fau (Tamasese 2001).

## Māfua'aga o le igoa o le nu'u o Sāmusu.

O Sāmusu o le nu'u māvae. E lua pitonu'u ua vaevaeina i ai; o Sāmusu Tai ma Sāmusu Uta, ae tasi le fa'alupega. O Sāmusu e tusa ma le 40 kilomita le mamao mai le taulaga o Apia. E lua mau tu'ufofoga e uiga i le māfua'aga o le igoa o le nu'u. O le mau muamua na māfua mai i le taua i le va o Tafua ma Fuataga

ma le au uso o Sa, Toa ma Veā ma Tau'ili'ili. O le taua na amata mai i le tuasivi o Āleipata i le mauaga ua fa'aigoa o Ōlomaga se'ia tau i le sami. O le mumusu o le au uso lenei e fa'ataunu'u le finagalo o i la'ua Matua na māfua ai le igoa o le nu'u (Talanoaga ma Tagoilefoe Ososo 2017).

O le mau lona lua e māfua mai i le taimi e fa'atino ai saofa'i i totonu o le nu'u. O upu faamanuia ma faalaeiau a matai o le nuu I nofo fou; o ou nafa ma tiute fa'amatai e atagia i lāuga a le Nofo a Vāega i le Faleātua e fa'atulou mai ai sa o Āmoa mai lava i ona vae se'ia o'o i lona ulu. O lona uiga ia ola ma oti mo le nu'u ae sa le musu.

### **Fa'alupega o Sāmusu**

E sefululima (15) tusi fa'alupega o Sāmoa ua fa'amauiina e fa'amatala ai fa'alupega o Sāmusu. E amata mai le tusi fa'alupega a Augustine Kramer sa lōmia i le tausaga e 1902 i le gagana Siāmani ae na fa'ato'ā fa'aliliu i le gagana Sāmoa ma le Fa'aperetania i le tausaga e 1994. O le tusi fa'alupega na lōmia lata mai nei i le tausaga e 2013. Ua aliali mai ai ni 'ese'esega i fa'amaumauga o fa'alupega o le nu'u ma o lo'o fa'alialia mulimuli ane.

Afio mai lau afioga Tago ma Aiga. Maliu mai lau fetalaiga Āmoa, o oe o le Matua, o le Tane o le itū. Maliu mai le Nofo a Vāega ia Sāmusu ma le Faleātua

### **Iloiloga o le fa'alupega o Sāmusu.**

E mai le selau (100) tausaga talu ai ua iloa ai suiga i fa'alupega, aganu'u ma agaifanua a le nu'u o Sāmusu. O le suafa Tago o le igoa atoa o Tagoilefoe o lo'o fa'alupe nei o le Sa'o. O ia e afio ma fa'asa'osa'o i le isi tala o le fale e feagai ma le suafa Āmoa. O ni isi tusifa'alupega e pei o lo'o fa'apea mai o Tago o le Matua (MWCD 2013: 87; Salua 1975: 22-31; Le Tagaloa 1997: 98-104). E le o le fa'alupega lea o le suafa Tagoilefoe o iai nei i le faigānu'u a Sāmusu. O le Matua o le fa'alupega lena o le suafa Āmoa i le faigānu'u a Sāmusu.

O 'Āiga o matai tamāli'i ia i totonu o le faigānu'u a Sāmusu. E aofia ai suafa; Vaotogo, Foutanu, Pitoulu, Ti'avega, Magaulitautifa, Malamala'ali'i, Taua'aletoa, Tolomala, Pātū ma isi. O Āmoa o lo'o fa'alupe nei o le Matua, o le Tane o le Itū i le va feagai ai ma Tui Ātua Fa'anofonofo, o Tafua ma Fumataga. O le fa'alupega lenei o le Matua e fa'amatalaina o le tagata e fa'amatua iai le nu'u. O ia na ulua'i fa'avaeina le nu'u. O le fa'alupega o le Tane o le Itū, o le fa'alagiga po'o le mamalu o Āmoa na to mai ia Tafua ma Fumataga i le vaeveaga o le fa'alupega o le itūmālō o Āleipata.

O le Nofoavāega i le Faleātua, e fa'asino lea i vāega e fa. O 'Āiga, Matāpule, 'Autapa'au ma le Faigāmalata. O 'Āiga (lātou te aumaia le tōfā e malu ai le nu'u) o matai tamāli'i, e aofia ai le suafa Tagoilefoe, Foutanu, Pitoulu, Malamala'ali'i, Vaotogo ma isi.

O le Matāpule (lātou te pūlea mea'ai ma tupe a le nu'u) e aofia ai suafa Su'a, Seiuli, 'Aumuamaāmoa, Sāmusuifaiga, Filimaua, Tiotioinu'u'ese, Puloutele, Tavai, Tufaina'atu ma isi. O le vāega a le 'Autapa'au (e tapa iai 'autau a le nu'u), o isi ia tulafale e aofia ai le suafa 'Aumualesigano, Utugaimatemate, Manupule ma isi. O le vāega a le Faigāmalata (e feagai ma faigatā o le nu'u), o isi ia tulafale, e aofia ai le suafa 'Aufesilafai, Tauaimeama'ama'ai, Paepae, Tauāfofolā ma isi.

**Faitau Aofai o Tagata Sāmusu mai Tusigāigoa o le tausaga e 1961 – 2016**

	Tausaga	Tama	Teine	Aofaiga o Ali'i ma Tama'ita'i	'Ese'esega mai Tusigāigoa Talu ai
1	1961	239	219	468	
2	1966	269	215	484	16
3	1976	262	246	508	24
4	1981	235	216	451	-57
5	1986	271	246	517	66
6	1991	296	254	550	33
7	1996	318	310	628	78
7	2001	373	310	683	55
8	2006	368	358	726	43
9	2011	417	406	823	97
10	2016	418	417	835	12

**Puna'oa: Matāgaluega o Fuainumera Fa'amaumauina.**

Ua mautinoa i le faitauaofa'i o tagata Sāmusu le fesuisuia'i o le aofa'iga o tagata fa'aopopo mai tausaga na fa'atino ai tusigāigoa e pei ona fa'alia i luga. E na o tusigāigoa i le tausaga e 1986, 1996 ma le 2011 o lo'o iloa ai le to'atele o le faitauaofa'i o tagata o le nu'u. Peita'i o isi tusigāigoa ua fa'amaumauina ai le to'aititi o tagata o Sāmusu.

O le tasi itū ua aliali mai, e mai lava i le tausaga e 1961 e o'o atu i le tausaga e 2016 e to'atele atu le aofa'iga o ali'i nai lo tama'ita'i.

**Monotaga a matai o Sāmusu**

O le monotaga o le auala lea e fa'atino ai le tautua a le tagata o lo'o matai i totonu o le nu'u. E fai lana monotaga e ala lea i saofaga i tupe, mea'ai po'o ni isi mea fai a le nu'u. A leai se monotaga a se matai e faia i le nu'u e le aloa'ia fo'i lea matai i totonu o le faigānu'u, po'o le saofa'iga a le nu'u. Ua pāsia e le Mālō le tūlāfono taufa'aofi o le *teuteuga o le Tūlāfono o Faigāpālota (2014)* e le mafai ai ona tauvā se matai i le faigāpālota pe afai e leai sana monotaga o faia i le nu'u o lo'o matai ai.

O le nu'u o Sāmusu e 59 matai o lo'o fai a lātou monotaga fa'alenu'u ma o lo'o nonofo i Sāmoa nei. E 12 matai o lo'o nonofo i atunu'u i fafo ae o lo'o fai e o lātou ā'iga a lātou monotaga. O faigafa'avae a le nu'u o Sāmusu, o le aso e fai ai saofa'i e fai ai fo'i ma le tupe o monotaga fa'alenu'u. O le tamāli'i e 6000.00 le tupe o lana saofa'i a o tulafale e 4000.00. E 500 aga'i i luga le tupe o monotaga. O lea faiga po'o ai lava le matai o lo'o nofo 'ese ma le nu'u po'o matai e nonofo i atunu'u i fafo, a o lea ua māe'a ona totogi tupe o a lātou monotaga. A fai fo'i tufagātupe po'o mea'ai a le nu'u e maua a lātou tupe ma fa'alumaga po'o mea'ai ona o lea e fai a lātou monotaga e o lātou 'āiga.

**Lotu i totonu o Sāmusu**

O le nu'u o Sāmusu e lima (5) lotu o lo'o iai talu mai le tausaga e 1952. O le Ekalesia Fa'alāpotopotoga Kerisiano i Sāmoa o le ulua'i Ekalesia lea sa fa'atūina i le tausaga e 1952 i totonu o Sāmusu ma o lo'o

fatūina i se vāega o le fanua o Tufa'anatu, se vāega o le fanua o 'Aumualesigano, se vāega o le fanua o Tavai ma se vāega o le fanua o Tauaimeama'ama'ai.

### ***E lua (2) Ekalesia Katoliko Roma o lo'o i totonu o le nu'u.***

O le Ekalesia Katoliko Roma a Sāmusu Tai sa tu'ufa'atasi ma Āmaile i le tausaga e 1909 ina ua ulua'i fa'atūina e Matā'afa Iosefo le lotu i Āmaile. Sa lolotu fa'atasi uma ai nu'u ia e lua. Peita'i o le tausaga e 1957 na tūla'i mai ai se fe'ese'esea'iga a matai o Sāmusu ma Āmaile ona ua tu le to'oto'o o matai Āmaile e fa'ate'a 'ese ai le Fesoasoani (Faife'au). O le māfua'aga lena na tēteva 'ese ai matai o Sāmusu. Peita'i o le tausaga e 1958 na fa'atūina ai loa le falesa a le Ekalesia Katoliko Roma a Sāmusu Tai i le fanua na ofo atu e le suafa Āmoa, na foa'i e Āmoa Tausilia mo le lotu. O le falesa a le Ekalesia Katoliko Roma a Sāmusu Uta sa fa'atūina i le tausaga e 1986 i le fanua o le suafa Pātū. O le Ekalesia Fa'apopotoga a le Atua i Sāmoa sa fa'atūina i le tausaga e 2004 i le fanua o le suafa 'Aumualesigano ma se vāega o le fanua o Vaigafā ma le Christian Elim Church sa fa'atūina i le tausaga e 1990 i le fanua o le suafa Sāmusuifaiga ma se vāega o le fanua o 'Aumualesigano.

O nei lotu e lima e tofua lava le lotu ma le falesa, fale o faife'au ma fale e fai ai fonotaga ma mea fai a aulotu (*hall*). E 'ese'ese uma foi 'āiga o le nu'u e ana fanua o lo'o fa'atutū ai nei fale.

O le nu'u lena o Sāmusu na silia ma le tolu sefulu tausaga o vaeluaina talu mai le tausaga e 1990. Na mafua ona vevesi ma vaeluaina le nu'u ona o le malaga sa'ili tupe a le nu'u na alu i Niu Sila i le tausaga e 1989 mo le fausiaina o se faleā'oga a le nu'u. Ua avea le lē manino o le tala o le tupe o le malaga na tulai mai ai loa le vevesi.

O le tausaga e 2000 sa sauni ai le tele o nu'u o Sāmoa mo le fa'amanatuina o le Meleniuma fou. O le taimi lea o lo'o avea Su'a Atonio Lemi, o le afio'aga o Sāmusu ma Faipule o le itūmālō o Āleipata Itūpā i Lalo. Sa taumafai ai loa le ali'i Faipule ina ia avea le Meleniuma fou e fai ai se fa'aleleiga a le nu'u. Na alu le sāvali a le ali'i Faipule i Ekalesia 'ese'ese i totonu o le nu'u i lena vaitaimi e tūpā so lātou finagalo. Na talia fiafia e faife'au a le nu'u ma faia ai loa le leleiga i le māsina o Tesema i le tausaga e 2000. O se vāega tāua lea o le talafa'asolopito o le nu'u.

I aso Sa muamua o Ianuari i tausaga ta'itasi ua faia ai lava le lotu tu'ufa'atasi a le nu'u atoa e fa'amanatu ai le leleiga a le nu'u talu mai le tausaga e 2000 ma o se faigafaavae foi lea ua faia e le Mālō. O se suiga lelei mo le nu'u atoa mo le tausaga o le filēmū ma le nofo fealofani o le nu'u. E o'o mai i le taimi nei o lo'o maopopo pea ma mamalu le pūlega mamalu a ali'i ma faipule o Sāmusu.

### **Fanuatano i Sāmusu**

O Sāmusu o lo'o iai le fanuatano a le EFKS sa fa'avaeina i le tausaga e 1952 i le fanua o le 'āiga o Tauaimeama'ama'ai ina ua fa'ato'ā fa'atūina le lotu EFKS i totonu o le nu'u. O le Ekalesia Katoliko Roma sa fa'avaeina la lātou fanuatano fai fa'atasi ma le Ekalesia Katoliko Roma a le nu'u o Āmaile i le tausaga e 1909 ina ua fa'avaeina e Mata'afa Iosefo le lotu i Āmaile. O 'āiga e ana fanua o lo'o aofia i le fanuatano o Pātū, Su'a ma Tago o Sāmusu a o le fanua o Tuimavave, Tupuola ma Tu'ua o Āmaile. E leai ni fanuatano o isi Ekalesia e tolu i totonu o le nu'u.

O le taimi nei ua tau le fa'aogāina fanuatanu a Ekalesia e tatanu ai tagata ae ua mātetele lava ina tatanu tagata o 'āiga i luma o lātou fale po'o ni isi vāega o lātou fanua. O le tasi lenei faiga ua fai e tagata i o lātou fanua fa'aleaganu'u. O le tanu o tagata i luma o fale ina ia alo'ia ma tāmāu ai le aiā i le fanua, nai lo le ave tanu fa'atasi i se fanuatanu se tasi (Taua'a 2017: 101-103; So'o 2017:81-86 )

### **Vaitafe ma vaipuna i Sāmusu**

O le nu'u o Sāmusu o lo'o iai le vai o le teine e igoa ia Taputapu, Vaipulau ma Lotopupula. O nei vai o lo'o fa'amatala ai le talatu'u ma le talafa'asolopito o le nu'u. O le vai o le teine o Taputapu, o lo'o fa'amatalaina e le talatu'u ia Ila ma Tualafalafa o faletua o le Tagaloalagi. O le vai e sa taputapu ona la'asia e se tasi sei vaganā ua fa'atulou ia Ila ma Tualafalafa (Talanoaga ma Amoa Tone, 2019).

#### ***Lotopupula***

O Lotopupula o le tasi lea vai o lo'o i le tuā'oi o Sāmusu ma Ti'avea. O le talatu'u e māfua ai lenei vai, o le taua o le itūmālō o Āleipata i aso ua mavae pe tusa o le fa (400) selau tausaga talu ai. O le taua i le va o Tau'ili'ili, Sa, Toa ma Veā fa'asaga ia Leifi ma Tautoloitua. O lea taua na amata mai i le tuasivi o Āleipata se'ia tau i le sami. O tagata na maua i le taua na fasiotia ma lafo i le loto. O ni isi sa maua o feola ma e pupula mai lava o lātou mata, ae lafo lava i le loto lenei ma fasiotia ai. O le māfua'aga lea ua fa'aigoaina ai lenei vai o Lotopupula (Talanoaga ma Pitolau Mita'i 2017).

#### ***Vaipulau***

O le vai o Vaipulau, o le vaitafe e tafe mai le tuasivi e tau i le sami e vase ai le tuā'oi o Sāmusu ma Salea'aumua. O le vaitafe e to'a ai le palapala uliuli. O le talatu'u e māfua ai lenei vai. O le malaga mai o le tama, lea na fa'aigoa ia Matā'afa mai Manu'a ma ia solisoli ai le matāfaga i Āmaile, ma maua ai le vai ua fa'aigoaina; o le Vai o le Tama. O le tu'ua ai e le tama o Āmaile ae agai i le itu i mātū o Sāmoa na māfua ai le igoa o le Vai o Vaipulau (Tupua 1996: 190).

### **Agaifanua e patino i le nu'u o Sāmusu.**

O agaifanua ua fa'amatalaina o aga a le fanua. O tu ma aga e fa'asino fa'apitoa lava i lea nu'u ma lea nu'u o Sāmoa (Tamasese 2001: 3). O agaifanua o aga ia e talitonu ma mulimulita'i ai se nu'u 'auā o lo'o tanumia ai fa'avae o le talafa'asolopito o lea nu'u.

O agaifanua a le nu'u o Sāmusu o tu ia ma aga e fa'asino fa'apitoa i le fanua. O lona uiga e fa'asino fa'apitoa ia aga i le nu'u o Sāmusu. E le so'ona fa'atinoina ia agaifanua se'i vaganā oni sauniga fa'apitoa a le nu'u e pei o se maliu o se ali'i tāua po'o le faia fo'i o se saofa'i a ali'i tāua o le nu'u.

#### ***Agaifanua i le taimi e fa'atino ai Saofa'i***

O le agaifanua ua fa'asino fa'apitoa i le nu'u o Sāmusu, o le fa'atinoga lea o saofa'i i suafa matai maualuluga o le nu'u, e pei o le suafa Tagoilefoe ma le suafa Āmoa. O lea agaifanua, a o'o ina faia se saofa'i, ona ta'ua lea o le fa'afotu tupu, pea afai o se suafa tamali'i, ae afai o suafa tulafale, ona fa'apea lea o le sao i mātāu, po'o le fa'afotu o le va'a'ulu. O le fa'atinoga o saofa'i a suafa maualuga o le nu'u o Sāmusu, e ati atoa mai

ai le 'ava mata ma fa'ata'atia i le malae. A o'o ina folafola 'ava ma fa'asoa, ona vaevae lea o le 'ava āti ma fa'asoa i le nu'u. E muamua le 'ava o Āmoa, ona soso'o lea ma 'ava o le nofo, po'o le tagata o lo'o fai lana saofa'i. O le 'ava e soso'o ai o le 'ava a Tagoilefoe, ona soso'o lea ma le 'ava o le Nofoāvaega i le Faleātua. O lona uiga o 'ava o matai tulafale e faia lāuga. E muamua le 'ava o le vāega a le Matāpule, soso'o le 'ava o le 'Autapa'au, soso'o le 'ava o le Faigāmalata ma le 'ava o Aiga po'o matai tamali'i e mulimuli (Talanoaga ma Tagoilefoe Ososo, 2016).

### ***Agaifanua o le fa'atinoga o Fai'aifua e iva (9).***

O le tasi lenei o agaifanua e fa'asino fa'apitoa i le nu'u o Sāmusu. O le taimi lava lea o saofai a tamāli'i maua luga o le nu'u e tapena ai fo'i e taulele'a fai'aifua e iva (9). O fai'aifua o le tasi lea taumafa a Sāmoa. E aumai le laufa'i ona fa'a'ofu'ofu lea, ae sasa'a iai le pe'epe'e, ona avatu lea o le isi laufa'i tapeleni ai, ona fa'a'ofu'ofu lea ia malu lelei, nonoa le pito o le laufa'i nei masa'a, ona ave lea tao i le umu. A fu'e le umu o lo'o tao ai fai'aifua nei e iva (9) ona aumai lea i luma o le nu'u. E tufa ma fa'asoa ia Āmoa, Tago ma le Nofoāvaega i le Faleātua. O le pinefa'amau po'o le fa'ailoga lea o fai'ai o tagata na feoti i le taua na manumālō ai le nu'u o Sāmusu. O lea agaifanua e le o toe fa'atinoina i le taimi nei, ae a o'o i taimi o lāuga e fa'apa'ia ai suafa matai i le taimi o saofa'i ona fa'ato'ā fa'alogoina lea o lea agaifanua.

### ***Agaifanua o Sa o le laoa i Falepule***

O le tasi lea o agaifanua a le nu'u o Sāmusu. O taimi e sa ma tapu ai le laoa pe a fai le saofa'i. O le fa'atinoga o saofa'i, e muamua ona potopoto le nu'u ona logo lea o le 'āiga o le a fai a lātou saofa'i, o lea ua potopoto le nu'u. A taunu'u loa nofo i le laoa i Falepule ma Alafa'alava, ona a'ami loa lea o Faife'au a le nu'u e o atu sei faia le sauniga lotu e fa'apa'ia ai nofo fou. A uma ona fa'apa'ia nofo ona tu'umuli lea o Faife'au ae alo le nu'u i le fa'atinoga o le 'ava.

O le taimi lea e ave'ese uma ai 'ofu o tagata uma o lo'o 'auai i totonu o le maota. E sa ma tapu ni gaiuiga e faia i totonu o le laoa i le taimi lea, e pei o le tutuina o se utufaga, sa nei toe tūla'i se tasi ma soli le laoa, sa ona toe faia lava se isi gaiuiga se'i vaganā ai le taimi lea o le fa'atau a tulafale. O le taimi lea e sa'ili ai se tasi e lāuga mai Vāega e fa, lea e ta'u nei o le Nofoavāega i le Faleātua. A maua se tasi e lāuga mai Vāega nei e fa, ona lāuga lea i le lāuga lava e tasi. O lona uiga, o upu lava e lāuga ai le tulafale o le Matāpule i Sa o Falepule, o upu fo'i ia e lāuga ai le tulafale o le 'Autapa'au, lāuga ai fo'i le Faigāmalata fa'apea ma le lāuga a 'Āiga. E fa lāuga ae tasi lava le fa'avae po'o le mamanu e mulimulita'i ai lāuga uma ia e fa. A mae'a lāuga e fa ona saunoa lea o Āmoa e fa'apa'ia ma fa'amanuia i nofo fou ona fa'ato'ā tufa lea o le 'ava.

### ***Agaifanua i le Fa'atinoga o le Lāuga i le Nofo / Saofa'i***

O le fa'avae o le nu'u e fa lāuga.. E ta'u e le nu'u, o le nofo a āti. O le isi igoa o le lāuga o le āti. A o'o ina fa'atulou Sa o Āmoa i le laoa i Falepule ma Alafa'alava ona fa'apea lea;

*Tulouna lau tōfā i le Matua Āmoa*

*Tulouna o oe o le Tane o le Itū, i le va nonofo ai ma Tui Ātua Fa'anofonofo*

*Tulouna lou Ao*

*Tulouna lou moliaoina*

*Tulouna ou A'ao*

### *Tulouna ou fofoga*

*Tulouna Falepule o le Laoa e Afio ai lau Tōfā le Matua.*

*Tulouna Alafa'alava o le laoa o le nu'u o Sāmusu.*

*Tulouna la outou Vāega a le Matāpule, Lau tōfā Su'a, lau tōfā Seiuli, Lau tōfā Tiotioinu'u'ese, lau tōfā 'Aumuamaāmoa, lau tōfā Sāmusuifaiga, lau tōfā Puloutele, lau tōfā Filimaua, lau tōfā Tufainaatu ma isi. O la outou matāfaioi o le pūlea o mea'ai ma meainu i totonu o le tātou nu'u. la pule ma le amiotonu ma le sa'o. la manuia la outou vāega.*

*Tulouna la outou Vāega o le 'Autapa'au, lau tōfā 'Aumualesigano, lau tōfā Manupule, lau tōfā Utugaimatemate. O la outou matāfaioi o le tapa atu iai 'au mo le taua e puipui ai le laoa lea. la manuia la outou vāega.*

*Tulouna la outou Vāega le Faigāmalata. Lau tōfā 'Aufesilafa'i, lau tōfā Tauāfofola, lau tōfā Tauaimeama'ama'ai. O la outou matāfaioi o le feagai lea ma faigatā ma tīgā o le nu'u. la manuia la outou vāega.*

*Tulouna la outou vāega le pa'ia i Ā'iga, lau afioga Vaotogo, lau afioga Pitolau, lau afioga Foutanu ma isi. O la outou matāfaioi o le aumaia lea o le tōfā e malu ai le nu'u. la manuia la outou vāega.*

O le fa'atinoga lea o Lāuga uma lava ia e fa pe a o'o i le taimi o le saofa'i i totonu o Falepule ma Alafa'alava. O le talitonuga o le nu'u atoa, o le fa'avae lea mai tausaga ua mavae, e o'o mai i le taimi nei o lo'o mulimuli ai lava le nu'u. A mae'a uma lāuga e fa, ona ave lea o le avanoa e saunoa mai ai Āmoa, e fa'amanuia i nofo fou, 'auā le fotua'i mai e tautua le nu'u. O le mae'a ai o le saunoaga a Āmoa, ona fa'ato'ā tufa loa lea o le 'ava. O le taimi e moto ai le 'ava, po'o le taimi fo'i e uma ai le 'ava, o le taimi lea fa'ato'ā uma ai loa sa o le laoa i Falepule ma Alafa'alava ona fa'ato'ā pule loa lea o le matai ma tagata o lo'o i totonu o le laoa i lana gaioga e fai.

### ***Agaifanua pe a Tu'umālō Tago po'o Āmoa***

O le tasi lea agaifanua a le nu'u o Sāmusu o lo'o fa'amamaluina pea e o'o mai i le taimi nei. O le taimi e tu'umālō ai le suafa Tago ma le suafa Āmoa, ona o lea o le Vāega a le Matāpule e manu le nu'u atoa. E o matai ma taulele'a e tu'i launiu le nu'u atoa. E sa ona so'ona pisapisaō le nu'u. O le aso e falelauasi ai se suafa Tagoilefoe po'o le Āmoa, o le aso fo'i lena e fata ai i le malae lona tino maliu.

O le fa'ata'ita'iga. O le tu'umālō o Āmoa Tausilia i le aso 4 Ianuari 1990 na fata mai ai lona tino maliu i le nu'u atoa. E fa'apena fo'i ina ua tu'umālō Tago Ososo i le aso 3 Iuni 2017, na fata mai fo'i lona tino maliu i le malae ma fa'ai'u atu ai i lona maota i Paepaetele i Sāmusu.

### ***Agaifanua o le Usuvaivai***

O le usuvaivai, o le tasi lea o agaifanua mamalu a Sāmoa e fa'atino pe afai ua malomaloā pe tigaina se gasegase o se alii tāua po'o se tulafale tāua o le nu'u. O le uiga o lenei agaifanua o le alu lea o le usu a le nu'u, a o tīgāina le gasegase o le matai o le 'āiga. E fia fa'alogologo le nu'u, po'o ai o le a māvae iai le matai la te soso'o i le suafa o le 'āiga. O lea agaifanua ua suia e ni isi nu'u i le usugasegase (Talanoaga ma Pitolau Pesa 2018).

O le nu'u o Sāmusu, fa'ato'ā fa'atino le usuvaivai pe afai ua maliu se matai o le nu'u. O le uiga moni ua fa'atino ai e Sāmusu lea agaifanua pe afai e maliu le matai, ona o suiga. O aso ua mavae a o fa'atino lea

agaifanua a o soifua le matai, e uma le usuvaivai a le nu'u, ae toe mālosi le gasegase o le matai, ma ua le talafeagai ma le agaga moni e fa'atino ai lea agaifanua. O le ala lea ua suia ai e le nu'u lea agaifanua, e fa'ato'ā fa'atino pe afai e maliu le matai. O le fa'atinoga o lea agaifanua e tu'ufa'asolo le lāuga i le Nofoavāega i le Faleātua. O lona uiga e fa'asolosolo i vāega e fa matai e faia le lāuga.

### Upu Fa'ai'u

O lenei tūsiga o lo'u lea sao tāua mo se mālamalama'aga o alo ma fānau a lo mātou nu'u, lo mātou itūmālō ma le atunu'u atoa. O lo'u popolega ne'i ta i nai fānau le ēfu o le fau. A le fa'amaumauina tala o nu'u e au ina tafea i le au. O fea la o le a sa'ili fa'alumaga iai alo ma fānau a Sāmoa i le mau?

O se vāega lea o le talafa'asolopito o Sāmusu. E ui lava e sau le taimi ma ona suiga ae avea lenei tūsiga o se matua ta'ita'i tama i lo lātou ola a'oa'oina i le potosalalau. O ni isi fo'i o i lātou e fia fa'asoa ini vāega ua le atoa pe ua misi i lenei tūsiga e manaia ae fa'aopopo ane ina ia taunu'u le mau a Sāmoa "O le tele o sulu e maua ai fīgota".

### PUNAOA

Government of Samoa, 2013, (2<sup>nd</sup> Edition). *Tusi Faalupega o Samoa*, Ministry of Women, Community and Social Development, Government Printing Press, Apia.

Government of Samoa, 2016, *Samoa Bureau of Statistics 2016 Brief Number 1*, Government Printing Press, Apia.

Grooves, E., 2019. *The Five Tala University: Higher Education in Developing Countries; A case study of the National University of Samoa*. National University of Samoa.

Henry, F 1980, *Talafaasolopito o Samoa*. Originally published as *Samoa: An Early History* (1958), this Samoan translation was undertaken by Rev.T.K. Faletoese. Apia: Samoa Commercial Printers.

Kramer, A 1994, *The Samoan Island, Vol 1*. Auckland; Polynesian Press.

Leauepepe, P 1995, *Samoa i lona soifuaga i ana tu ma ana aganu'u*, Commercial Printers Limited, Apia.

Le Tagaloa, A, F 2003, *Tapuai – Samoa Worship*: Malua Printing Press.

Le Tagaloa, A, F 1997, *O le Faasinomaga*. Apia: Lamepa Press.

Le Tagaloa, A, F 1996, *O La Ta Gagana*. Apia: Lamepa Press.

Le Tagaloa, P 1991, *OFA: se faalepo poo se faalani*. Pacific Printers and Company Ltd. Apia: Western Samoa.

Meads, M 1930, *Social Organisation of Manua*. Honolulu, Bishop Museum, Bulletin 76

Fautuaga. Laumua o Suesuega i Mataupu Tau Samoa, Lunivesite Aoao o Samoa.

Meleisea, M and Meleisea, P (eds) 1987, *Lagaga: A short history of Western Samoa*. Suva: Institute of Pacific Studies, University of the South Pacific.

Methodist Church, 1985, *O le Tusi Faalupega o Samoa*, Apia: Methodist Printing Press.

Ministry of Youth Sports and Culture Affairs (MYSCA) 2010, *Samoa Nei Galo, Samoa Lest We Forget*, Vol 6: Quik Printing Apia.

Ministry of Youth Sports and Culture Affairs (MYSCA) 2005, *Samoa Nei Galo, Samoa Lest We Forget*, Vol 5: Quik Printing Apia.



Ministry of Youth Sports and Culture Affairs (MYSCA) 2002, *Samoa Nei Galo, Samoa Lest We Forget*, Vol 4: Commercial Printers.

National University of Samoa Corporate Plan 2021-2024

Pio, M 1972, *O le Palefuiono*, Commercial Printers; Apia

Pita, L 1995, *Samoa i lona soifuaga i ana aganu'u*. Auckland: Pacific Book Producers Ltd.

Sa'iliemanu, L, D 2020, *Oral Traditions, Cultural Significance of Storytelling and Samoa Understandings of Place or Fanua: Native American and Indigenous Studies*, Vol 7. University of Minesota Press.

Salua, F, S 2007, *O le Tafafa o au Measina Samoa*. Government Printing. Apia: Samoa.

Salua, F, S 1975, *O le Tafatolu o au Measina Samoa*. Department of Communication of the Presbyterian Church of Aotearoa N.Z.G P Print, Wellington: NZ.

Sauoaiga, A, L 1988, *O le mavaega i le tai*. Apia: Malua Printing.

Schultz, E 1953, *Samoaan proverbial Expression: Alagaupu FaaSamoa*. Suva: Polynesian Press.

Simanu, A, M 2011, *O Faia Faatumua o Samoa mai Tala o le Vavau*. University of Hawaii.

Sio, G, P 1984, *Compass of Sailing in Storm*. Apia: USP Center.

So'o, A 2017, *O Suiga i Faasalaga Faalenuu, Suafa Sa'o o Aiga ma Fanua Faaleaganuu*. Measina a Samoa Conference Proceedings, Vol 7, National University of Samoa

So'o, A 2007, *The Rewards and Challenges of Holding Several Matai Titles. Changes in Matai System-Suiga i le Faamatai*. National University of Samoa.

Tamasese, T, T 2001, *Talanoaga na loma ma ga'opo'a*. Apia, Samoa, Pacific Printers and Publishers.

Tautunu, M 2007, *O le Valaau mai le Tuugamau*. MWCD Division for Printing, Apia: Samoa.

Tavita, M 2002, *Fausaga o Lauga Samoa, Vol 2*. Apia: National University of Samoa.

Tavita, M 1999, *Fausaga o Lauga Samoa Vol 1*. Apia: National University of Samoa.

Tofaeono, T, T 2012, *O ni isi tala o le Foafoga o Samoa*. Wordsell Press.

Tupua, F 1996, *O le suaga o le Vaatele: The findings of the big canoe*. Samoa Observer Co Ltd, Apia: Samoa